

四庫全書

子部

欽定四庫全書

子部

法苑珠林卷二十四

詳校官中書臣沈鳳輝

檢討臣何思鈞覆勘

總校官檢討臣何思鈞

校對官中書臣葉蘭

謄錄監生臣馬衍宗

欽定四庫全書

法苑珠林卷二十四

唐 釋道世 撰

敬佛篇第六之五

彌勒部之餘

讚歎

如菩薩本行經云正使化無數億計人成辟支佛若有人百歲四事供養功德甚多不如有人以歡喜心一四

句偈讚歎如來功德無量又如善戒經云以四天下寶  
供養於佛又以重心讚歎如來是二福德等無差別又  
大悲經云一稱南無佛名者以是善根入涅槃界不可  
盡也又若能至誠心念佛功德乃至一華散於空中於  
未來世作天梵王其福不盡以其不盡終至涅槃又涅槃  
經迦葉以偈讚佛言

大悲愍衆生 故令我歸依 善拔衆毒箭

故稱大醫王 世醫所療治 雖瘡還復生

如來所治者 畢竟不復發 世尊甘露藥  
以施諸衆生 衆生既服已 不死亦不生  
如來今為我 演說大涅槃 衆生聞秘藏  
即得不生滅

又大方等陀羅尼經爾時華聚菩薩即讚佛言

世尊身色如金山 猶如日光照世間

能拔一切諸苦惱 我今稽首大法王

世主法王甚希有 如是妙法復過是

難見難聞亦難遇

若有覩者成正覺

爾時阿須倫以偈讚佛

世尊面目如日月

能滅一切諸黑闇

今復拔濟於我等

我等歸命天中尊

文殊師利問經文殊說偈歎佛云

我禮一切佛

調御無等雙

丈六真法身

亦禮於佛塔

生處得道處

法輪涅槃處

行住坐卧處

一切皆悉禮

諸佛不思議

妙法亦如是 能信及果報 亦不可思議  
能以此祇夜 讚歎如來者 於千萬億劫  
不墮諸惡趣

佛言文殊善哉善哉如來不可思議即說偈言

佛生甘蔗姓 滅已更不生 若人歸依佛

不畏地獄苦

如是  
三說

又華嚴經偈云

寧受一切苦 得聞佛音聲 不受一切樂

而不聞佛名 所以無量劫 受此諸苦惱

流轉生死中 不聞佛名故

又彌勒菩薩所問本願經云佛告阿難彌勒不獨以偈讚我乃往過世十無央數劫爾時有佛號焰光響作王如來所有梵志長者名曰賢行於此佛所已得不起法忍爾時梵志賢行者今彌勒菩薩是阿難白佛言彌勒得法忍久遠乃爾何以不速逮無上正真之道成最正覺耶佛語阿難菩薩四事法不取正覺何等為四一淨



國土二護國土三淨一切四護一切是為四事彌勒本  
求佛時以是四事故不取佛佛語阿難我本求佛時亦  
有此四然彌勒發意先我之前四十二劫我於其後乃  
發道意於此賢劫以大精進超越九劫得於無上正真  
之道致最正覺佛告阿難我以十事致最正覺何等為  
十一所有一切無所愛惜二妻妾三兒子四頭目五手  
足六國土七珍寶財物八髓腦九血肉十不惜身命我  
以十事疾得佛道又大悲經云佛告阿難汝觀如來在

路行時能令大地高處令下下處令高高下諸處悉得  
平正如來過後地輒還復一切樹林傾側向佛樹神現  
身低頭禮拜如來過後樹輒還復一切丘陵坑坎屏廁  
臭穢叢林瓦礫皆悉掃除平正清淨馨香芬烈衆華布  
地如來足履蹈上而過無情諸物尚皆傾側何況有情  
而不加敬何以故我本修行菩薩行時於一切人所無  
不傾側謙下禮敬以是善業得成佛已有情無情如來  
行時無不傾側低頭禮拜我本曾以清淨微妙稱意資

產至心自手施諸衆生以是業報如來行時大地平正  
掃灑清淨又無瓦礫我於無量諸賢聖所在路行時曾  
與掃治道路泥治房舍我以平等心無高下掃治令淨  
於一切時常求菩提利益衆生以是善根若佛如來在  
在處處行來路首自然清淨地平如掌乃至須彌山王  
高八萬四千由旬在大海中亦深爾許及鐵圍山高十  
六萬八千由旬亦是金剛堅固佛涅槃時無不傾側低  
頭禮敬若欲遠避不傾側者亦無是處由歎如來故乃

至舍利弗從他聞歎佛偈亦得道果故普曜經安陸比丘以偈報舍利弗言

吾師天中天 三界無極尊 相好身丈六

神通猶虛空 華熏去五陰 拔十二根本

不貪天世位 心淨開法門

時舍利弗欣然大悅如冥覩明口言善哉昔來抱疑又吾好學八歲從師至年十六靡不周綜行遍天下十六大國自謂已達今乃聞異無上正真得吾本願由如來

過去心淨離著不害衆生故所行之處脚足不汙蟲蟻  
不損故處處經云佛不著履有三因緣一使行者少欲  
二現足下輪三令人見之歡喜佛行足去地四寸有三  
因緣一見地有蟲蟻故二地有生草故三現神足故亦  
欲令人意止佛行地高下皆平有三因緣一本行四等  
心欲令一切安隱地在水上水中有神蟲蛾一切值佛  
足下皆安隱同心立意是故卑者為高高者為卑二諸  
天鬼神行福為佛除地故高下為平三佛為菩薩時通

利道徑橋梁渡人故從是得福故高下正平欲令人意  
亦爾又智度論云世尊身好細薄皮相塵土不著身如  
蓮華葉不受塵水若菩薩在乾土山中經行土不著足  
隨嵐風來吹破土山令散為塵乃至一塵不著佛身若  
菩薩舉食著口中是時咽喉邊兩處流注甘露和合諸  
味是味清淨故名味中得上味又增一阿含經云無恭  
敬心於佛者當生龍蛇中以過去從龍中來今猶無敬  
多睡癡也又四分律說偈云

有敬長老者 是人能護法 現世得名譽

將來生善道

讚彌勒四禮文

玄奘法師  
依經翻出

至心歸命禮當來彌勒佛諸佛同證無為體真如理實  
本無緣為誘諸天現兜率其猶幻士出衆形元無人馬  
迷將有達者知幻未曾然佛身本淨皆如是愚夫不了  
謂同凡知佛無來見真佛於茲必得永長歡故我頂禮  
彌勒佛唯願慈尊度有情願共諸衆生上生兜率天奉

見彌勒佛

至心歸命禮當來彌勒佛佛有難思自在力能以多刹  
內塵中況今現處兜率殿師子牀上結跏坐身如檀金  
更無比相好寶色曜光暉神通菩薩皆無量助佛揚化  
救舍靈衆生但能至心禮無始罪業定不生故我頂禮  
彌勒佛唯願慈尊度有情願共諸衆生上生兜率天奉  
見彌勒佛

至心歸命禮當來彌勒佛慈尊寶冠多化佛其量超過



數百千此土他方菩薩會廣現神變寶牕中佛身白毫  
光八萬恒說不退法輪因衆生但能修福業屈伸臂頃  
值慈尊恒沙諸佛由斯現況我本師釋迦文故我頂禮  
彌勒佛唯願慈尊度有情願共諸衆生上生兜率天奉  
見彌勒佛

至心歸命禮當來彌勒佛諸佛恒居清淨刹受用報體  
量無窮凡夫肉眼未曾識為現千尺一金軀衆生視之  
無厭足令知業果現閻浮但能聽經勤誦法逍遙定往

兜率宮三塗於茲必永絕將來同證一法身故我頂禮  
彌勒佛唯願慈尊度有情願共諸衆生上生兜率天奉  
見彌勒佛

業因

如未曾有經云下品十善謂一念頃中品十善謂一食  
頃上品十善謂從旦至午於此時中心念十善止於十  
惡亦得往生故野干心念十善七日不食生兜率天又  
上生經云我滅度後四衆八部欲生第四天當於一日

至第七日繫念彼天持佛禁戒思念十善行十善道以

此功德迴向願生彌勒佛前隨念往生

言七日者且從近說尚感彼天

何況一生而不尅獲

又上生經云若有禮敬彌勒佛者除却百億

劫生死之罪乃至來世龍華樹下亦得見佛又云我滅

度後四衆八部聞名禮拜命終往生兜率天中若有男

女犯諸禁戒造衆惡業聞是菩薩大悲名字五體投地

誠心懺悔一切惡業速得清淨若有歸依彌勒菩薩當

知是人得不退轉彌勒成佛見佛光明即得受記又上

生經云佛滅度後若有精勤修諸功德威儀不缺掃塔  
塗地華香供養行諸三昧讀誦經典如是人等雖不斷  
結如得六通應當繫念念佛形像稱彌勒名若一念頃  
受八戒齋修諸淨業命終之時即得往生兜率天上蓮  
華臺中應時見佛白毫相光超越九十億劫生死之罪  
隨其宿緣為說妙法令得不退又增一經云衆生三業  
造惡臨終憶念如來功德者必離惡道趣得生天上正  
使極惡之人以念佛故亦得生天又大集經云若修慈

者當捨身命時見十方佛手摩其頂蒙手觸故心安快  
樂尋得往生清淨佛土又普賢觀經云若有晝夜六時  
禮十方佛誦大乘經思第一義甚深空法於一彈指頃  
除百萬億那由他恒河沙劫生死之罪行此法者真是  
佛子從諸佛生十方諸佛及諸菩薩為其和上是名具  
足菩薩戒者不須羯磨自然成就應受一切人天供養  
又法華經云若有人受持讀誦正憶念解其義趣是人  
命終為千佛授手令不恐怖不墮惡道即往兜率天上

彌勒菩薩所彌勒菩薩有三十二相大菩薩衆所共圍  
遶有百千萬億天女眷屬而於中生有如是等功德利  
益是故智者應當一心自書若使人書受持讀誦正憶  
念如說修行又智度論云若善男子能行是深般若波  
羅蜜者當知是人人道中來或兜率天來所以者何三  
惡道中罪苦多故不得行深般若欲界諸天著淨妙五  
欲心則狂惑故不能行色界天等著禪定味故不能  
行無色界天無形故故不能行以兜率天上常有一生

補處菩薩彼中諸天常聞說般若五欲雖多法力勝故  
是故說二處勝若從他佛國來生此間斯則轉勝也又  
處處經云佛言彌勒未來下有四因緣一有時福應彼  
間二是此間人粗無能受經者三功德未滿四世間有  
能說經者故彌勒未下若當來下餘有五十億七千六  
十萬歲彌勒時人眼皆見四千里由本十種因緣德一  
不掩人眼明二不損人眼三不覆人眼四不藏人善五  
不視殺六不視盜七不視姪八不視陰私求人短九諸

惡事不視十然燈於佛寺又佛說彌勒來時經云佛言  
彌勒佛欲來出時閻浮剎內地山樹草木皆焦盡於今  
閻浮剎地周匝六十萬里彌勒出時閻浮剎地東西長  
四十萬里南北廣三十二萬里地生五果四海之內無  
山陵溪谷地平如砥樹木長大人少三毒民多聚落城  
名汜羅那夷有一婆羅門名須凡當為彌勒作父母名  
摩訶越題彌勒當為作子相好具足身長十六丈生墮  
城地目徹視萬里內頭中目光照四千里彌勒得道為



佛時於龍華樹下坐樹高四十里廣亦四十里

大成佛經華枝

如龍頭故名龍華樹亦有別傳云子從龍宮出故名龍華樹也

用四月八日明星出時

得道彌勒佛却後六十億劫六十萬歲當來下

自外大同成佛

經說王玄策西國行傳云唐顯慶二年勅使王玄策等往

西國送佛袈裟至泥婆羅國西南至頗羅度來村東坎

下有一水火池若將家火照之其水上即有火焰於水

中出欲滅以水沃之其焰轉熾漢使等曾於中架二釜

煮飯得熟使問彼國王國王答使人云曾經以杖刺著

一金匱令人挽出一挽一深相傳云此是彌勒佛當來成道天冠金火龍防守之此池火乃是火龍火也又智度論云彌勒菩薩為白衣時師名婆跋梨有三種相一眉間白毫相二舌覆面相三陰藏相如是等非是菩薩時亦皆有此相也又新婆沙論云曾聞尊者大迦葉波入王舍城最後乞食食已未久登雞足山山有三峯如仰雞足尊者入中結跏趺坐作誠言曰願我此身并納鉢杖久住不壞乃至經於五十七俱胝六十百千歲慈

氏如來應正等覺出現世時施作佛事發此願已尋般  
涅槃時彼三峯便合成一掩蔽尊者儼然而住及慈氏  
佛出現世時將無量人天至此山上告諸衆曰汝等欲  
見釋迦牟尼佛土多功德弟子衆中第一大弟子迦葉  
波不舉衆咸曰我等欲見慈氏如來即以右手撫雞足  
山頂應時峯坼還為三分時迦葉波將納鉢杖從中而  
出上昇虛空無量天人覩斯神變歎未曾有其心調柔  
慈氏世尊如應說法皆得見諦若無留化如此之事云

何有耶有說有留化事問若爾世尊何故不留化身至  
涅槃後任持說法答所應作者已究竟故謂佛所應度  
皆已度訖所未度者聖弟子度之有說無留化事問若  
爾迦葉波事云何得有答諸信敬天神所任持故有說  
迦葉波爾時未般涅槃慈氏佛時方取滅度此不應理  
寧可說無不說彼默然多時虛作如是說者有留化事  
是故大迦葉波已入涅槃

發願

惟凡夫力弱習惡來多以住娑婆其心怯弱初學是法  
恐懼退散常發大願扶持此行乃至命終心無障惱隨  
種善根願共舍識自在往生彌勒內衆得至佛前隨念  
修學證不退轉不願往生於外衆中恐著五欲不得解  
脫故智度論云有人修少福業聞有福處常願往生及  
至命終各生其中又大莊嚴論云佛國事大獨行功德  
不能成就要須願力如牛雖力挽車要須御者能有所  
至淨佛國土由願引成以願力故福德增長不失不壞

常見佛故又如十住論云若人發心求佛不休不息有  
人以指舉大千世界在空却住不足為難若發願言我  
當作佛是人希有何以故世人心劣無大志故又發菩  
提心論有十大願常悉修行一者願我先世及以今身  
所種善根施與一切衆生迴向佛道令我此願念念增  
長世世所生終不忘失常為陀羅尼之所守護二者願  
我以此善根生處值佛常得供養不生無佛國中三者  
願我近諸佛隨侍左右如影隨形四者願我既得親近

為我說法成就五通五者願我通達世諦假名流布解  
第一義得正法智六者願我以無厭心為衆生說示教  
利害皆令開解七者願我以佛神力遍至十方一切世  
界供養諸佛聽受正法廣攝衆生八者願我隨順清淨  
法輪一切衆生聽我法者聞我名者即得捨離一切煩  
惱九者願我隨逐衆生將護與樂捨身命財荷負正法  
除無利益十者願我雖行正法心無所行亦無不行為  
化衆生不捨正願願我以此十大誓願遍衆生界攝受

一切恒沙諸願若衆生界有盡我願乃盡然衆生界不可盡故我此大願亦不可盡廣度衆生無邊法界所修善根皆悉迴向無上正覺生彌勒佛前聞清淨法悟無生忍但行住坐卧一生已來所修善根並共法界衆生迴向彌勒佛前速成不退玄奘法師云西方道俗並作彌勒業為同欲界其行易成大小乘師皆許此法彌陀淨土恐凡鄙穢修行難成如舊經論十地已上菩薩隨分見報佛淨土依新論意三地菩薩始可得見報佛淨



土豈容下品凡夫即得往生此是別時之意未可為定  
所以西方大乘許小乘不許故法師一生已來常作彌  
勒業臨命終時發願上生見彌勒佛請大衆同時說偈  
云

南無彌勒如來

應正等覺

願與舍識

速奉慈顏

南無彌勒如來

所居內衆

願捨命已

必生其中

感應緣

畧引  
六驗

晉譙國戴逵

晉沙門釋道安

宋尼釋慧玉

梁沙門釋僧護

隋沙門釋靈幹

唐沙門釋善甯

夫最勝之相妙出無等非直光儀莫寫固亦形好不傳

夫以世俗之指爪而匠法身之圓極算數譬喻豈或萬  
一自泥洹以來久踰千祀西方像製流式中夏雖依經  
鎔鑄各務髣髴名士奇匠競心展力而精分密數未有  
殊絕晉世有譙國戴逵字安道者風清襟遠留邈舊吳  
宅性居理遊心釋教且機思通贍巧疑造化乃所以影  
響法相咫尺應身乃作無量壽挾侍菩薩研思致妙精  
銳定製潛於帷中密聽衆論所聞褒貶輒加詳改覈准  
度於毫芒審光色於濃淡其和墨點采刻形鏤法雖周

人盡策之微宋客象楮之妙不能踰也委心積慮三年方成振代迄今所未曾有凡在瞻仰有若至真俄而迎像入山陰之靈寶寺道俗觀者皆發菩提心高平郝超聞而禮覲遂撮香而誓曰若使有常復覩聖顏如其無常願會彌勒既而手中之香勃焉自燃芳烟直上其氣聯雲餘燠歲蕤溢於衢路凡預聞見皆心喜遍身宋臨川康王撰宣驗記亦載其顯瑞戴公居去靈寶百有餘步戴常中夜而起見寺上有光其明甚熾謂是燔火狼

狽往赴隣曲知者咸競駿奔而至寺門靜閉迺像放光  
明旦衆聞扣門方起共觀咸覩佛堂暉燄洞照于天莫  
不整躬虔禮歎覺化之無方也宋文帝迎像供養恒在  
後堂齊高帝起正覺寺欲以勝妙靈像鎮撫法殿乃奉  
移此像舊在正覺寺遼又造行像五軀積慮十年像舊  
在瓦官寺遼第二子顓字仲若素韻淵澹雅好丘園既  
負荷幽貞亦繼志才巧遼每製像常共參慮濟陽江夷  
少與顓友夷嘗託顓造觀世音像致力罄思欲令盡美

欽定四庫全書

法苑珠林  
卷二十四

六

而相好不圓積年無成後夢有人告之曰江夷於觀世  
音無緣可改為彌勒菩薩戴即停手馳書報江信未及  
發而江書已至俱於此夕感夢語事符同戴喜於神應  
即改為彌勒於是觸手成妙初不稽思光顏圓滿俄爾  
而成有識讚仰感悟因緣之匪差此像舊在會稽龍華  
寺尋二戴像製歷代獨步其所造甚多並散在諸寺難  
悉詳錄

晉長安五級寺有釋道安姓衛氏常山扶柳人也形雖

不逮於人而聰雋罕儔七歲讀書再覽能誦年至十三  
出家日誦萬言不差一字師敬異之為受具戒恣其遊  
學至鄴乃入中寺遇佛圖澄澄見而嗟異與語終日因  
事澄為師澄講安覆疑難鋒起安挫銳解紛行有餘力  
時人語曰漆道人驚四鄰安後避地南投襄陽與弟子  
釋慧遠等四百餘人渡江夜行值雷雨乘電光而進前  
行得入一家見門裏有二馬柳中間懸一馬篋可容一  
斛安呼林伯升主人驚出果姓林名伯升謂是神人厚

相奉接既而弟子問何以知其姓字安曰兩木為林苑  
容百升也既至襄陽有一外國銅像形製古異時衆不  
甚恭重安曰像形相致佳但髻形未稱令弟子鑪冶其  
髻既而光焰煥炳曜滿一堂詳視髻中見一舍利衆咸  
愧服安曰像既靈異不煩復治乃止識者咸謂安知有  
舍利故出以示衆時襄陽習鑿齒鋒辯天逸籠罩當時  
其先籍安高名早以致書通好承應真履正明白內融  
慈訓兼照道俗齊蔭自大教東流四百餘年雖蕃王居



士時有奉者而真丹宿訓先行上世道運時遷俗未愈  
悟自須道業之隆盛無以近所謂月光將出靈鉢應降  
法師任當洪範化洽無幽此方諸僧咸有思慕若塵靈  
東徂摩尼迴曜一攝七寶之座暫現明哲之燈雨甘露  
於豐草植梅檀於江湄則如來之教復崇於今日玄波  
溢漾重蕩於末代矣文多不悉載及聞安至止即往修  
造既坐稱言四海習鑿齒安曰彌天釋道安時人以為  
名答安常注諸經恐不合理乃誓曰若所說不甚達理

願見瑞相乃夢見胡道人頭白眉毛長語安云君所注經殊合道理我不得入泥洹住在西域當相助弘通可時時設食後十誦律至遠公乃知和上所夢賓頭盧也於是立座飯之處處成則安既德為物宗學兼三藏所制僧尼軌範佛法憲章條為三例一曰行香定座上經上講之法二曰常日六時行道飲食唱時法三曰布薩差使悔過等法天下寺舍遂則而從之安每與弟子法遇等於彌勒前立誓願生兜率後至秦建元二十一年

正月二十七日忽有異僧形甚庸陋來寺寄宿寺房既  
近處之講堂時維那直殿夜見此僧從牕隙出入遽以  
白安安驚起禮訊問其來意答云相為而來安曰自惟  
罪深詎可度脫彼答云甚可度耳然須更浴聖僧情願  
必果具示浴法安請問來生所生之處彼乃以手虛撥  
天之西北即見雲開備覩兒率妙勝之報爾夕大衆數  
十人悉皆同見安後營浴具見有非常小兒伴侶數十  
來入寺戲須臾就浴果是聖應也至其年二月八日忽

告衆曰吾當去矣是日齋畢無疾而卒塋城內五級寺中是歲晉泰元十年也年七十二安未終之前每先聞羅什在西國思共講析每勸堅取之什亦遠聞安風謂是東方聖人恒遙而禮之初安生而便左臂有一皮廣寸許著臂捋可得上下之唯不得出手時人謂之寶印手菩薩安既終後十六年什公方至什恨不相見悲恨無極安既篤好經典志在宣法所請外國沙門僧伽提婆曇摩難提及僧伽跋澄等譯出衆經百餘萬言常與

沙門法和詮定音字詳覈文旨新出衆經於是獲正孫  
綽為名德沙門論目云釋道安博物多通才經名理又  
為之贊曰

物有廣贍人固多宰淵淵釋安專能兼倍飛聲汧壘馳  
名淮海形雖革化猶若常在

有別記云河北別有竺道安與釋道安齊名謂習鑿齒  
致書於竺道安道安本隨師姓竺後改為釋世見其二

姓因謂為兩人謬矣

右此二驗出  
梁高僧傳

宋尼釋慧王長安人也行業勤修經戒通備嘗於長安  
薛尚書寺見紅白光十餘日中至四月八日六重寺沙  
門來遊此寺於光處得彌勒金像高一尺餘慧王後南  
渡樊郢住江陵靈收寺元嘉十四年十月夜見寺東樹  
有紫光爛起暉映一林以告同學妙光等而悉弗之見  
也二十餘日王常見焉後寺主釋法弘將於樹下營築  
禪基仰首條間得金坐像亦高尺許也

右此一驗  
出冥祥記

梁剡石城山有釋僧護本會稽剡人也少出家便尅意

苦節戒行嚴淨後居剡石城山隱岳寺寺北有青壁直  
上數十餘丈當中央有如佛焰光之形上有叢樹曲幹  
垂蔭護每經行至壁所輒見光明煥炳聞絃管歌讚之  
聲於是擎鑪發誓願博山鑄造十丈石佛以敬擬彌勒  
千尺之容使凡厥有緣同覩三會以齊建武中招結道  
俗初就彫剪竦鑿移年僅成面璞頃之護遘疾而亡臨  
終誓曰吾之所造本不期一生成辦第二身中其願尅  
果後有沙門僧淑纂襲遺功而資力莫由未獲成遂至

梁天監六年有始豐令吳郡陸咸罷邑還國夜宿剡溪  
值風雨晦冥咸皆危懼假寐忽夢見三道人來告云若  
識信堅正自然安隱有建安殿下感患未瘳若能治剡  
縣僧護所造石像得成就者必獲平豫冥理非虛宜相  
開發也咸還都經年稍忘前夢後出門乃見一僧云聽  
講竒宿自言去歲剡溪所囑建安王事猶憶此不咸當  
時懼然答云不憶道人笑曰宜更思之仍即辭去咸悟  
其非凡乃倒屣諮訪追及百步忽然不見咸豁爾意解



具憶前夢乃剡溪所見第三僧也咸即馳啟建安王王  
即以上聞勅遣僧祐律師專任像事王乃深信益加喜  
踊充遍抽捨金貝誓取成畢初僧祐未至一日寺僧慧  
達夢見黑衣大神翼從甚壯立于龕所商畧分數至明  
旦初祐律師至其神應若此初僧護所創鑿龕過淺乃  
鑿入五丈更施頂髻及身相尅成瑩磨將畢夜中忽當  
卍字處色赤而隆起今像留卍字處猶不施金薄而赤  
色存焉像以天監十二年春就功至十五年春竟坐軀

高五丈立形十丈龕前架三層臺又造門閣殿堂并立  
衆基業以充供養其四遠士庶並提挾香華萬里來集  
供施往還軌迹填委自像成之後建安王所苦消瘳王  
後改封今之南平是也

右一駭出  
梁高僧傳

隋西京大禪定道場釋靈幹俗姓李氏金城狄道人也  
志節恭勤常修淨業依華嚴經作蓮華藏世界海觀及  
作彌勒天宮觀至開皇十七年遇疾暴悶唯心不冷未  
敢藏殯後醒述云初見兩人手把文書房前而立曰官

須見師俛仰之間乃與俱往狀如乘空足無所涉到大園七寶樹林端嚴如畫二人送達便辭而退幹獨入園東西極目但見林地山池無非珍寶焜煌亂目不得正視樹下花座或有人坐或無坐者忽聞人喚云靈幹汝來此耶尋聲就之乃慧遠法師也禮訊問曰此為何所答曰是兜率陀天吾與僧休同生於此次吾南坐上者是休法師也遠與休形並非本身頂戴天冠衣以朱紫光偉絕世但語聲似舊依然可識又謂幹曰汝與我

諸弟子後皆生此矣因得覺悟重增故業端然觀行絕  
交人物至大業三年禪定初成勅召為道場上座僧徒  
一盛匡救有敘至於八年於本房內所患漸重將欲終  
卒目睛上視不與人對久之乃垂顏如常日沙門童真  
問疾因見是相幹謂真曰向見青衣童子二人來召相  
逐而去至兜率天城外未得入宮若翹足舉望則見城  
中寶樹華蓋若平立即無所見也傍侍疾者向舉目者  
是其相矣真曰若即住彼大遂本願幹曰天樂非久

終墜輪迴華嚴藏海是所圖也不久氣絕須臾復  
蘇童真問何所見耶幹曰見大水遍滿華如車輪幹坐  
其上所願足矣尋爾便卒

童真法師是隋時曰大  
禪定寺主武德初亡也

以大

業八年正月二十九日卒於本寺春秋七十有八也

唐西京淨影寺釋善胄俗姓淮氏瀛州人也通敏易悟  
極閑論激機辯為心美譽聞徹於仁壽末年奉勅置塔  
送舍利子梓州牛頭山華林寺嚴鑾將達感緒八頭突  
倒輦下從行至館驅逐乃走還來如故漸至城治黑峰

四枚形甚壯偉隨輦旋遶數帀便去既至州館夜放大  
光明徹屋上如火焰發食頃方滅又掘塔基入深丈餘  
正當函處得古瓷瓶無蓋有水清澄香美乃用盛於函  
內寺九層浮圖從西南角第二級放光上照相輪如五  
石甕黃赤如火良久方隱又堂內彌勒像亦放眉間紫  
光并二菩薩亦放赤光通照寺院前後七度衆人同見  
除不來者武德三年八月內終於本寺春秋七十有一

右二驗出  
唐高僧傳

普賢部

感應緣

畧引  
四驗

宋路昭太后

宋沙門釋道溫

宋沙門釋道罔

齊沙門釋普明

宋路昭太后大明四年造普賢菩薩乘寶輦白象安於  
中興禪房因設講于寺其年十月八日齋畢解座會僧

二百人于時寺宇始構帝甚留心輦蹕臨幸旬必數四僧徒勤整禁衛嚴肅爾日僧名有定就席久之忽有一僧預于座次風貌秀舉闔堂驚矚齋主與語往還百餘言忽不復見列筵同覩識其神人矣

宋大明年中有寺統法師名道溫居在秣陵縣既見皇太后睿鑒冲明聖符幽洽滌思淨場研襟至境固以聲藻震中事靈梵表迺創思鎔斲抽寫神華模造普賢彩儀盛像寶傾宙珍妙盡天飾所設講齋訖今月八日觀



會有限名薄索定引次就席數無盈減轉經將半景及  
昆吾忽覩異僧預于座內容止端嚴氣貌秀發舉衆矚  
目莫有識者齋主問曰上人何名答曰名慧明問住何  
寺答云來自天安言對之間倏然不見闔堂驚覓遍筵  
肅慮以為明祥所賁幽應攸闡紫山可覩華臺不遠蓋  
聞至誠所感還景移緯澄心所殉發石開泉況帝德涵  
運皇功懋洽仁洞乾遐理暢冥外故上王盛士尅表大  
明之朝勸發妙身躬見龍飛之室意若曰陛下慧燭海

縣明華日月故以慧明為人名繼天興祚式垂無疆故以天安為寺稱神基彌遠道政方凝九服識泰萬寓齊悅謹列言屬縣以詮天休

宋沙門釋道罔扶風好時人也本姓馬氏學業淳粹弱齡有聲元嘉二年九月在洛陽為人作普賢齋道俗四十許人已經七日正就中食忽有一人袴褶乘馬入至堂前下馬禮佛罔謂常人不加禮異此人登馬揮鞭忽失所在便見赤光赫然竟天良久而滅後三年十二月

在白衣家復作普賢齋將竟之日有二沙門容服如凡  
直來禮佛衆中謂是庸僧不甚尊仰即問何居答曰住  
在前村時衆白衣有張道覺其有異至心禮拜沙門出  
門行可數十步忽有飛塵直上衝天追目此僧不復知  
所問以七年與同學來遊京師時司空何尚之始構南  
澗精舍問寓居焉夜中忽見四人乘一新車從四人傳  
教來在屋內呼與共載道問驚其夜至疑而未言因眼  
閉不覺昇車俄而至郡後沈橋見一貴人著帙被箋布

單衣坐牀燾繖形似華蓋鹵簿從衛可數百人悉服黃衣見罔驚曰行般舟道人精心遠詣旨欲知其處耳何故將來即遣人引送罔還至精舍門外失所送人門閉如故扣喚久之寺內諸僧咸驚相報告開門內之視所

住房戶猶故關云

右三驗出冥祥記云

齊上定林寺有釋普明姓張臨渭人少出家稟性清純蔬食布衣以懺誦為業誦法華維摩二經及諷誦之時有別衣別座未嘗穢雜每至勸發品輒見普賢乘象立

在其前誦維摩經亦聞空中唱樂又善神呪所救皆愈  
有鄉人王道真妻病請明來呪明入門婦便悶絕俄見  
一物如狸長數尺許從狗竇出因此而愈明嘗行水傍  
祠巫覡自云神見之皆奔走以宋孝建中卒春秋八十

有五

右一驗出  
唐高僧傳

法苑珠林卷二十四

校譌

第二十四紙

八行房本  
傳作戶

音釋

嵐

盧含切

挽

武縮切  
引也

坼

恥格切  
裂也

鑄

陟慮切  
金入範

鎔

慈消切  
國名

切

覈

胡得切  
考也

儔

祖峻切  
絕異也

柳

疑剛切  
馬柱也

範

當候切  
馬籠也

飼

盧活切  
切撥

也摩

汧

苦堅切  
水名

秣

莫葛切  
陵地名

懋

莫候切  
治盛也

袴

袴苦瓦切  
褶是

執切  
騎服也  
袴褶





欽定四庫全書

法苑珠林卷二十五

唐 釋道世 撰

敬佛篇第六之六

觀音部

感應緣

畧引十八驗

秦尚書徐義

秦東平畢覽

晉沙門竺法義

晉沙門竺法純

晉沙門釋開達

晉太原郭宣之

晉吳郡潘道秀

晉居士藥苟

晉沙門釋法智

晉南公子教

晉益州孫道德

晉遼城劉度

晉河內竇傳

宋新興張興

宋居士宋琰

魏沙門釋道泰

魏定州孫敬德

魏沙門釋法力

秦徐義者高陸人也少奉法為符堅尚書堅末兵革蜂起賊獲義將加戮害乃埋其兩足編髮於樹夜中專念觀世音有頃得眠夢人謂之曰今事亟矣何暇眠乎義便驚起見守防之士並疲而寢乃試自奮動手髮既解足亦得脫因而遁去百餘步隱小叢草便聞追者交馳火炬星陳乎繞此叢而竟無見者天明賊散歸投鄴寺遂得免之

秦畢覽東平人也少奉法隨慕容垂北征沒虜單馬逃

竄虜追騎將及覽至心誦念觀世音既得免脫因入深山迷惑失道又專心持念中夜見一道人法服持錫示以途徑遂得還路安隱至家

晉始寧山有竺法義晉興寧中沙門遊刃衆典尤善法華受業弟子常有百餘至咸安二年忽感心氣疾病常存念觀世音乃夢見一人破腹洗腸寤便病愈傅亮每云吾先君與義公遊處而聞說觀世音神異莫不大小肅然矣

晉沙門竺法純山陰顯義寺主也晉元興中起寺行牆至蘭上買材路經湖道材主是婦人而應共至材所准許價直遂與同船俱行既入大湖日暮暴風波浪如山純船小水入命在瞬息念值行無福忽遇斯災又與婦人俱行何以罔懼乃一心誦觀世音經俄有大舟泛流趣純適時既入夜行旅已絕純自惟念不應有此流船疑是神力既而共渡乘之而此小船應時即没大舟隨波鼓蕩俄得達其岸耳

晉沙門釋開達隆安二年登壘採甘草為羌所執時年  
大飢羌胡相噉乃置達柵中將食之先在柵者十有餘  
人羌日夕烹菹唯達尚存自達被執便潛誦觀世音經  
不懈乎心及明日當見噉其晨始曙忽有大虎遙逼羣  
羌奮怒號吼羌各駭怖迸走虎乃前噬柵木得成小閤  
可容人過已而徐去達初見虎噬柵必謂見害既柵穿  
而不入心疑其異將是觀音力計度諸羌未應便及即  
穿柵逃走夜行晝伏遂得免脫

晉郭宣之太原人也義熙四年為楊思平梁州府司馬  
楊以輒害范元之等被法宣亦同執在獄唯一心歸向  
觀世音菩薩後夕將眠之際忽親覩菩薩光明照獄宣  
瞻覲禮拜祈請誓願久之乃沒俄而宣之獨恩赦既釋  
依所見形製造圖像又立精舍焉後零陵衡陽卒官

晉潘道秀吳郡人年二十餘為軍糾主因隨北征既而  
軍小失利秀竄逸被掠經數處作奴俘虜異域欲歸無  
因少信佛法恒志心念觀世音每夢寐輒見後既南奔



迷不知道於窮山中忽覩真形如今行像因作禮禮竟  
豁然不覺失之乃得還路遂歸本土後精進彌篤年垂  
六十而亡

晉藥苟不知何許人也少奉法嘗作福富平令先從征  
盧循值小失利舫遭火垂盡賊亦交逼正在中江風浪  
駭目苟恐怖分盡猶誦念觀世音俄見江中有一人挺  
然孤立腰與水齊苟心知祈念有感火賊已切便投水  
就之身既浮涌胛似履地尋而大軍遣船迎接敗者遂

得免濟

晉沙門釋法智為白衣時嘗獨行至大澤中忽遇猛火四方俱起走路已絕便至心禮誦觀世音俄然火過一澤之草無有遺莖者唯智所處容身不燒於是始乃敬奉大法後為姚興將從征索虜軍退失馬落在圍裏乃隱溝邊荆棘叢中得蔽頭復念觀世音心甚勤至隔溝人遙喚後軍指令煞之而軍過投覓輒無見者遙得免濟後遂出家

晉南宮子敖始平人也戊新平城為狒狒虜兒長樂公所破合城數千人皆被誅害子敖雖分必死而猶至心念觀世音既而次至子敖羣刃交下或高或僻持刀之人忽疲懈四支不隨爾時長樂公親自臨刑驚問之子敖聊爾答云能作馬鞍乃令原釋子敖亦不知所以作此言時後遂得遁逸造小形像貯以香函行則頂戴也晉孫道德益州人也奉道祭酒年過五十未有子息居近精舍景平中沙門謂德必願有兒當至心禮誦觀世

音經此可冀也德遂罷不事道單心投誠歸觀世音少日之中而有夢應婦即有孕遂以產男也

晉劉度平原聊城人也鄉里有一千餘家並奉大法造立形像供養僧尼值虜主木末時此縣嘗有逋逃木大怒欲盡滅一城衆並兇懼分必殄盡度乃潔誠率衆歸命觀世音頃之末見物從空中下繞其所住屋柱驚視乃觀世音經使人讀之末大歡喜用省刑戮於是此城即得免害

晉竇傳者河內人也永和中并州刺史高昌冀州刺史  
呂護各權部曲相與不和傳為昌所用作官長護遣騎  
抄擊為所俘執同伴六七人共繫入一獄鎖械甚嚴尅  
日當然之沙門支道山時在護營中先與傳相識聞其  
執厄出至獄所候視之隔戶共語傳謂山曰今日困厄  
命在漏刻何方相救山曰若能至心歸請必有感應傳  
先亦頗聞觀世音及得山語遂專心屬念晝夜三日至  
誠自歸觀其鎖械如覺緩解有異於常聊試推盪忽然

離體傳乃復至心曰今蒙哀祐已令桎梏自解而同伴  
尚多無心獨去觀世音神力普濟當令俱免言畢復牽  
挽餘人皆以次解落若有割剔之者遂開戶走出於警  
微之間莫有覺者便踰城逕去時夜已向曉行四五里  
天明不復進共逃隱一榛中須臾覺失囚人馬絡繹四  
出尋捕焚草踐林無不至遍唯傳所隱一畝許地終無  
至者遂得免還鄉里敬信異常咸皆奉法道山後過江  
為謝居士數具說其事

右十四驗  
出冥祥記

宋張興者新興人也頗信佛法嘗從沙門僧融曇翼時受八戒興嘗為劫所引夫得走逃妻坐繫獄掠笞積日時縣失火出囚路側會融翼同行經過囚邊妻驚呼閤梨何以賜救融曰貧道力弱無救如何唯宜勤念觀世音庶獲免耳妻便晝夜祈念經十許日於夜夢一沙門以脚踏之曰咄咄可起妻即驚起鉗鎖桎梏忽然俱解便走趨戶戶時猶閉警防殊嚴既無由出慮有覺者乃還著械尋復得眠又夢向沙門曰戶已開矣妻覺而馳

出守備者並已昏睡妻安步而去時夜甚闇行可數里卒值一人妻懼避地已而相訊乃其夫也相扶悲喜夜投僧翼翼藏匿之遂得免時元嘉初也

宋琰稚年在交趾彼土有賢法師者道德僧也見授五戒以觀世音金像一軀見與供養形製異今又非甚古類元嘉中作鎔鑄殊工似有真好琰奉以還都時年在齠齔與二弟常盡勤至專精不倦後治改弊廬無屋安設寄京師南澗寺中于時百姓競鑄錢亦有盜毀金像



以充鑄者時像在寺已經數月琰晝寢夢見立于座隅  
意甚異之時日已暮即馳迎還其夕南澗十餘軀像悉  
遇盜亡其後久之像於曠暮間放光顯照三尺許地金  
輝秀起煥然奪目琰兄弟及僕役同覩者十餘人于時  
幼小不即題記比加撰錄忘其日月是宋大明七年秋  
也至泰始末琰移居烏衣周旋僧以此像權寓多寶寺  
琰時暫遊江都此僧仍適荆楚不知像處垂將十載常  
恐神寶與因俱絕宋升明末遊蹟峽表經過江陵見此

沙門迺知像所其年琰還京師即造多寶寺訪焉寺主  
愛公云無此寄像琰退慮此僧孟浪將遂失此像深以  
惆悵其夜夢人見語云像在多寶愛公忘耳當為得之  
見將至寺此人手自開殿見像在殿之東衆小像中的  
的分明詰旦造寺具以所夢請愛公愛公乃為開殿果  
見此像在殿之東如夢所覩遂得像還時建元元年七  
月十三日也像今常自供養庶必永作津梁修復其事  
有感深懷沿此徵覲綴成斯記夫鏡接近情莫踰儀像

瑞驗之發多自此興經云鎔斷圖績類形相者爰能行動及放光明今西域釋迦彌勒二像暉用若冥蓋得相乎今華夏景措神應亟著亦或當年羣生因會所感假憑木石以見幽異不必尅由容好而能然也故沈石浮深實闡閩吳之化塵金瀉液用舒彭宋之禍其餘銓示繁方雖難曲辯率其大哲允歸目從若夫經塔顯効旨

證亦同事非殊貫故繼其末

右二驗出冥祥記也

魏常山衡唐精舍釋道泰元魏末人夢人謂曰爾至某

年當終於四十二矣泰寤懼之及至其年遇病甚憂悉  
以身資為福有友人曰余聞供養六十二億菩薩與一  
稱觀音福同無異君何不至心歸依可必增壽泰乃感  
悟遂四日四夜專精不絕所坐帷下忽見光明從戶外  
而入見觀音足趺蹠間金色朗照語泰曰汝念觀世音  
耶比泰褰帷頃便不復見悲喜流汗便覺體輕所患悉  
愈聖力所加後終延年

魏天平年中定州募士孫敬德造觀音像自加禮敬後

為劫賊所引不勝拷楚妄承其死將加斬決夢一沙門  
令誦救生觀世音經千遍得脫有司執縛向市且行且  
誦臨刑滿千刀斫自折以為二段皮肉不傷三換其刀  
終折如故視像項上有刀三迹以狀奏聞丞相高歡表  
請免死勅寫其經廣布於世今謂高王觀世音經自晉  
宋梁陳秦趙國國分十六時經四百觀音地藏彌勒彌  
陀稱名念誦獲得救者不可勝紀具諸傳錄故不備載  
魏末魯郡釋法力未詳何人精苦有志勤營塔寺欲於

魯郡立精舍而材不足與沙彌明琛往上谷乞麻一載  
將還行空澤中忽遇野火車在下風恐無得免法力倦  
眠比寤而火勢已及因舉聲稱觀未遑稱世音應聲風  
轉火焰尋滅安隱還寺又有沙門法智本為白衣獨行  
大澤猛火四面一時同至自知必死乃合面於地專稱  
觀世音怪無火燒舉頭看之一澤之草纖毫並燼唯智  
所伏僅容身耳因此感悟捨俗出家又沙門道集於壽  
陽西山遊行為二賊所得縛繫在樹將欲殺之唯念觀

音守死不輟引刀屢斫皆無傷損劫賊怖走集因得脫  
又沙門法禪山行逢賊危欲害之唯念觀音挽弓射之  
放箭不得賊遂歸誠投弓於地知是神人怖捨逃逝

右二

驗出唐僧行遠  
高僧傳九真法

頌曰

釋化能仁

觀機降天

衆聖之上

實為帝先

交養怡和

濯粹沖源

慈誨舍識

善誘中玄

恩舒慧炬

燭我宵然

隨機變化

孰識其年

望之遐舉

即亦雲津

殷之以形

悼之以神

三乘既弘

雙林遺身

假唱泥洹

正法常宣

敬法篇第七之一

述意部

蓋聞寂然不動是則無象無言感而遂通所以有名有  
教是以一四之句難聞三千之火易入庶使凝寒靜夜



朗月長霄獨處空閑吟誦經典吐納宮商文字分明言  
味流美詞韻相屬適衆人心利生物善足使幽靈欣躍  
精神悅豫久習純熟文義洞曉敬心殷誦至誠冥感信  
知受持一偈福利弘深書寫一言功超數劫是以迦葉  
頂受靡恪剥皮薩陀心樂無辭灑血此是甘露之初門  
入道之終德也

聽法部

如付法藏經云佛言一切衆生欲出三界生死大海必

假法船方得度脫法為清涼除煩惱熱法是妙藥能愈  
結病法是衆生真善知識作大利益濟諸苦惱所以然  
者一切衆生志性無定隨所染習近善則善近惡則惡  
若近惡友便造惡業流轉生死無有邊際若近善友起  
諸敬心聽受妙法必能令離三塗苦惱由此功德受最  
勝樂華氏國王有一白象能滅怨敵若人犯罪令象蹋  
殺後時象廢為火所燒移象近寺象聞比丘誦法句經  
偈云

為善生天

為惡入淵

象聞法已心便柔和起慈悲心後付罪人但以鼻嗅舌舐而去都不肯殺王見斯已心大惶怖即召諸臣共謀此事智臣白王此象近寺必聞妙法是故爾耳今可移近屠肆處繫王用其言象見屠殺惡心猛熾殘害更增是以當知一切衆生志性無定畜生尚爾聞法生慈見殺增害豈況於人而不染習是故智者宜應覺知見惡須棄觀善宜近勤聽經法又於往昔有婆羅門持人鬻

髒其數甚多詣華氏城中通行街賣經歷多時都無買者時婆羅門極大瞋恚高聲罵言此城中人愚癡闇鈍若不就我買髒髒者我當與作惡名聞也爾時城中諸優婆塞聞畏毀謗便將錢買即以銅筋貫穿其耳若徹過者便與多價其半徹者與價漸少都不通者全不與直婆羅門言我此髒髒皆悉無異何故與價差別不等優婆塞言前徹過者此人生時聽受妙法智慧高勝貴其如此相與多價其半徹者雖聽經法未善分別故與

少直全不通者此人往昔都不聽法故不與價時優婆塞持此髑髏往至城外起塔供養命終之後悉得生天以是因緣當知妙法有大功德此優婆塞以聽法人髑髏起塔而供養之尚得生天況能至心聽受經法供養恭敬持經人者此之福報實難窮盡未來必當成無上道是故智者欲得無上安隱快樂應當至心勤聽經法賢愚經云昔佛在世時舍衛國中須達長者信敬佛法為僧檀越衆僧所須一切供給須達家內有二鸚鵡一

名律提二名賒律提稟性點慧解人言語見比丘來先  
告家內令出迎送阿難後時到長者家見鳥聰點為說  
四諦苦集滅道門前有樹二鳥聞法飛向樹上歡喜誦  
持夜在樹宿野狸所食緣此善根生四王天盡彼天壽  
生忉利天忉利壽盡生夜摩天夜摩壽盡生兜率天兜  
率壽盡生化樂天化樂壽盡生於第六他化自在天他  
化壽盡還生化樂如是次第還復下至四天王天四天  
壽盡還復上至他化自在天如是上下經於七返生六

欲天自恣受樂極天之壽而無中天後時命終來生人中出家修道得辟支佛一名曇摩二名修曇摩賢愚經云昔佛在世時有一比丘林中誦經音聲雅好時有一鳥聞法敬愛在樹而聽時為獵師所射命終緣此善根生忉利天面貌端正光相眇然無有倫匹自識宿命知因比丘誦經聽法得生此中即持天華到比丘所禮敬問訊以天香華供養比丘比丘具問知其委曲即命令坐為其說法得須陀洹既得果已還歸天上禽鳥聽法

尚獲福報無邊豈況於人信心聽法寧無善報善見律  
論云昔佛在世時到瞻婆羅國迦羅池邊為衆說法時  
彼池中有其一蛤聞佛池邊說法之聲即從池出入草  
根下聽佛說法時有一人持杖放牛見佛在坐為衆說  
法即往佛所欲聞法故以杖刺地誤著蛤頭即便命終  
生忉利天以福報故宮殿縱廣十二由旬與諸天女娛  
樂受樂即乘宮殿往至佛所頭頂禮足佛知故問汝是  
何人忽禮我足神通光明相好無比照徹此間蛤天人



以偈而答言

往昔為蛤身 於水中覓食 聞佛說法聲

出至草根下 有一牧牛人 持杖來聽法

杖斲刺我頭 命終生天上

佛以蛤天人所說偈為四衆說法是時衆中八萬四千人皆得道迹蛤天人得須陀洹果含笑而去

求法部

如雜寶藏經云昔有一女人聰明智慧深信三寶常於

僧次請二比丘就舍供養後時便有一老比丘次到其舍年老根昧素無知曉齋食訖已女人至心求請說法數座頭前閉目靜坐比丘自知不解說法趣其泯眼棄走還寺然此女人至心思惟有為之法無常苦空不得自在深心觀察即時獲得須陀洹果即得果已向寺求覓欲報其恩然此比丘自審無知棄他逃走倍生慚恥轉復藏避而此女人苦求不已方自出現女人見已具說蒙得道果因緣齋供報恩老比丘聞甚大慚愧深自

尅責亦復獲得須陀洹果是故行者應當至心精誠求法若至心者所求必獲涅槃經云佛言我念過去作婆羅門在雪山中修菩薩行時世無佛亦無經法時天帝釋觀見菩薩獨在山中修諸苦行即下試之自變其身作羅刹像甚可怖畏住菩薩前口說半偈

諸行無常  
是生滅法

說是偈已遍觀四方菩薩聞偈心生歡喜即從座起以手舉髮四向顧視不見餘人唯見羅刹即便往問大士

何處得是半偈此半偈義乃是三世諸佛正道羅刹答  
言汝不須問我不食來已經多日處處求索了不能得  
飢渴苦惱心亂謬語非我本心之所知也菩薩復語若  
能為我說是偈竟我當終身為汝弟子羅刹答言汝智  
太過但自憂身都不見念我今飢逼實不能說菩薩復  
語汝食何食羅刹答言我所食者唯人暖肉其所飲者  
唯人熱血菩薩聞已即語羅刹但能具足說是偈竟我  
當以身奉施供養羅刹答言誰當信汝為八字故棄所

愛身菩薩答言我今有證梵釋四王諸佛菩薩能為我  
證羅刹聞已勅聽許說菩薩歡喜即脫皮衣為敷法座  
白言和上願坐此座善為我說羅刹即說生滅滅已寂  
滅為樂說是偈已菩薩深思然後處處石壁道樹書寫  
此偈竟上高樹投身而下未至地頃時虛空中出種種  
聲爾時羅刹還復釋身接取菩薩安置平地懺悔辭謝  
頂禮而去緣為半偈捨身因緣超十二劫在彌勒前成  
無上道涅槃經云佛言我念過去無量無邊那由他劫

此娑婆世界有佛出世號釋迦牟尼為衆生宣說大涅槃經我於爾時從善友所傳聞佛說大涅槃經心中歡喜即欲供養貧無財物遂行賣身薄德不售即欲還家路見一人而復語言吾欲賣身君能買不其人答言我家作業人無堪者吾有惡病良醫處藥應當日服人肉三兩卿若能以身肉三兩日日見給便當與汝金錢五枚我時聞已歡喜語言惠我七日須我事訖便還相就其人答言聽汝一日我即取錢往至佛所禮已奉獻然

後誠心聽受是經我時闇鈍唯受一偈

如來證涅槃 永斷於生死 若能至心聽

常得無量樂

受是偈已至病人家雖復日日與肉三兩以念偈故不  
以為痛日日不廢足滿一月其人病瘥瘡亦平復我時  
見身具足平復即發菩提願未來世成佛之時亦願號  
字釋迦牟尼以是因緣今得成佛又集一切福德三昧  
經云昔過去久遠阿僧祇劫有一仙人名曰最勝住山

林中具五神通常行慈心後作是念非但慈心能濟衆  
生唯集多聞能滅衆生煩惱邪見能生正見念已便詣  
城邑聚落處處推求說法之師時有天魔來語仙言我  
今有佛所說一偈汝今若能剥皮為紙刺血為墨析骨  
為筆寫此偈當為汝說最勝仙人聞已念言我於無量  
百千劫中常以無事為他割截受苦無量都無利益我  
今當捨不堅之身易得妙法歡喜踊躍即以利刀剥皮  
為紙刺血為墨析骨為筆合掌向天請說佛偈時魔見



已愁憂憔悴即便隱去仙人見已作如是言我今為法  
不惜身命剥皮為紙刺血為墨析骨為筆為衆生故至  
誠不虛餘方世界有大慈悲能說法者當現我前作是  
語時東方去此三十二刹有佛國土名普無垢其國有  
佛號淨名王忽住其前放大光明照最勝身苦痛即除  
平復如故佛即廣為說集一切福德三昧最勝聞法得  
無礙辯佛說法已還沒不現最勝仙人得辯才已為諸  
衆生廣說妙法令無量衆生住三乘道經千歲後而乃

命終生淨名王普無垢國由敬法故今得成佛佛告淨  
威昔最勝者今我身是是以當知若有人能恭敬求法  
佛於其人不入涅槃法亦不滅雖在異土常面覩佛得  
聞正法

感福部

如普曜經云若有賢人聞是經典叉手自歸即捨八事  
懈怠之本成八功勲何謂為八一得端正好色二得力  
勢強盛三得眷屬滋茂四逮得辯才無量五學疾得出

家六所行清淨七得三昧定八得智慧明無所不照若  
有法師布座諷誦是經得八座福何謂為八一得長者  
座二得轉輪王座三得天帝座四得自在天座五得羅  
漢座六得菩薩座七得如來座八得轉法輪度脫一切  
衆生座若有法師頒宣是法有讚歎善哉者當得八清  
淨行何謂為八一言行相應無所違失二口言至誠而  
無虛妄三在於衆會真諦無欺四所言人信不捨遠之  
五所言柔輒初無粗獷六其聲悲和猶如哀鸞七身心

隨時音聲如梵會中人聞莫不諮受八音響如佛可衆  
生心若有書是經典得八大藏何謂為八一得意藏未  
曾妄捨二所得心藏無所不解分別經法三得往來藏  
普解一切諸佛經法四得總持藏一切所聞皆能識念  
五得辯才藏為諸衆生頒宣經典皆歡喜受六甚深法  
藏將護正法七道意法藏未曾斷絕三寶法教八奉行  
法藏則輒逮得無所從生忍又華嚴經云善男子假使  
有人以大海等墨須彌聚筆書寫此經一一品一一法

門一一方便一一法門一句中義味猶不能盡又大  
乘莊嚴論云諸菩薩於大乘法有十種正行一書寫二  
供養三流傳四聽受五轉讀六教化七習誦八解說九  
思擇十修習此十正行能生無量功德又中邊分別論  
云大乘修行有十一書寫二供養三施與他四若他讀  
誦一心聽聞五自讀六自如理取名味句及義七如道  
理及名句味顯說八正心聞誦九空處如理思量十已  
入意為不退失故又菩薩藏經云復次舍利子是善男

子善女人等受持是經殷重聽聞讀誦解義乃至為他廣分別說當知是人復得如是十種功德稱讚利益何等為十一者成就機速慧二者成就捷辯慧三者成就猛利慧四者成就迅疾慧五者成就廣博慧六者成就甚深慧七者成就通達慧八者成就無著慧九者常現前見一切如來既得見已以清美頌而為讚歎十者善能如理請問如來又能如理開釋疑難舍利子是名獲得十種功德稱讚利益復次舍利子是善男子善女人

等受持是經讀誦解義乃至為他廣分別說當知是人  
復獲如是十種功德稱讚利益何等為十一者常樂遠  
離諸不善友二者常樂親近諸善知識三者能緩諸魔  
所有繫縛四者摧殄諸魔所有軍陣五者善能訶厭一  
切煩惱六者於一切行心恒捐捨七者違背一切向惡  
趣道八者歸向一切趣涅槃道九者善說一切越度生  
死清淨之施十者巧能隨學一切菩薩所行軌則又能  
奉行諸佛教勅如是名為十種功德稱讚利益又涅槃

經云法是佛母佛從法生三世如來皆供養法也又度  
無極集經云昔有比丘精進守法所可諷誦是般若波  
羅蜜其有聞者莫不歡喜有一小兒厥年七歲城外牧  
羊遙聞比丘誦經聲即詣精舍禮拜聽其經言時說色  
空聞即悟解便問比丘應答不可小兒反為比丘解說  
其義昔所希聞怪此小兒智慧非凡時小兒即去逐牛  
至山值一虎害此小兒命終生長者家夫人懷妊口便  
能說般若波羅蜜從朝至夜初不懈息其長者家怪此



夫人謂呼鬼病有比丘至舍聞聲甚喜比丘報言此非鬼病但說尊經夫人出禮比丘復為說法諸有疑難不能及者盡為解說衆僧歡喜日月滿足產得男兒適生叉手長跪說波羅蜜夫人產已還復如本比丘言真佛弟子好養護之此兒後大當為一切衆人作師吾等悉當從其啟受時兒七歲道法悉備舉衆超絕智度無極經中誤脫皆為刪定兒母所至輒開化人長者室家大小五百人衆皆從兒學八萬四千人皆發無上正真道

意五百比丘聞兒所說盡漏意解志求大乘得法眼淨  
是時兒者則吾身是比丘者迦葉佛是又舍利弗處胎  
經云母懷舍利弗母亦聰明高僧傳云母懷羅什令母  
聰明舊日誦千偈懷胎已日得二千偈初成須陀洹果  
後得斯陀舍果

法師部

如勝天子經云若有法師流通此經處此地即是如來  
所行於彼法師當生善知識心尊重之心猶如佛心見


是法師恭敬歡喜尊重讚歎又云我若住世一劫若減  
一劫說是流通此經法師功德不能究盡若此法師所  
行之處善男子善女人宜應刺血灑地令塵不起如是  
供養未足為多如來法輪難受持故又華嚴經云譬如  
金翅鳥王飛行虛空安住虛空以清淨眼觀察大海龍  
王宮殿奮勇猛力以左右翅搏開海水悉令兩闢知龍  
男女有命盡者而撮取之如來應供等正覺金翅鳥王  
亦復如是安住無礙虛空之中以清淨眼觀察法界諸

宮殿中一切衆生若有善根已成熟者奮勇猛力止  
觀兩翅搏開生死大愛海水隨其應出生死大海除滅  
一切妄想顛倒安立如來無礙之行又涅槃經云若有  
善男子善女人聞是經名生四惡趣者無有是處若有  
衆生一經耳者悉能滅除一切諸惡無間罪業又云若  
有衆生一經耳者却後七劫不墮惡道又云若有能知  
如來常住無有變異或聞常住二字音聲一經於耳即  
生天上後解脫時乃能證知如來常住無有變易又華

嚴經云若聞一句未曾聞法勝得三千大千世界珍寶  
是菩薩得聞一偈正法生上財想勝得轉輪聖王位又  
法華經云若善男子善女人受持是法華經若讀若誦  
若解說若書寫是人當得八百眼功德千二百耳功德  
八百鼻功德千二百舌功德八百身功德千二百意功  
德又涅槃經云我涅槃後若有得聞如是大乘微妙經  
典生信敬心當知是等於未來世百千億劫不墮惡道  
又云若有於一恒河沙佛所發心然後乃能於惡世中

不謗是法愛樂是典不能為人分別廣說若有二恒河沙佛所發心然後乃能於惡世中不謗是法正解信樂受持讀誦亦不能為他人廣說若有於三恒河沙佛所發心然後乃能於惡世中不謗是法乃至書寫經卷雖為他說未解深義若有於四恒河沙佛所發心然後乃能於惡世中不謗是典乃至書寫經卷為他廣說十六分中一分之義若有於五恒河沙佛所發心乃至於惡世中為人廣說十六分中八分之義若有於六恒河沙

佛所發心乃至於惡世中為他廣說十六分中十二分  
義若於七恒河沙佛所發心乃至於惡世中為他廣說  
十六分中十四分義若有於八恒沙佛所發心乃至於  
惡世中書寫經卷亦勸他人令得書寫自能聽受亦勸  
他人令解聽受如說修行具足能解盡其義味



法苑珠林卷二十五